

UPM Perkasa OKU Melalui Program Prihatin Kasih

Oleh: Nurul Ezzaty Mohd Azhari

Foto: Noor Azreen Awang



SERDANG, 14 Mei – Universiti Putra Malaysia (UPM) menerusi Fakulti Bahasa Moden dan Komunikasi (FBMK) telah menganjurkan Program Prihatin Kasih OKU sebagai usaha memperjuangkan kebajikan golongan Orang Kurang Upaya (OKU), di sini, hari ini.

Pengarah program, Nursyafiqah Ahmad Tarnizi yang merupakan pelajar semester empat, Bachelor sastera bahasa dan linguistik melayu berkata program ini bertujuan untuk membentuk persekitaran pembelajaran yang inklusif dan mesra OKU di dalam kampus.

“FBMK merupakan fakulti yang mempunyai ramai pelajar golongan OKU di UPM iaitu seramai 26 orang. Oleh itu, kita jalankan program ini di FBMK sebagai langkah ke arah memperkasa golongan OKU dan memastikan mereka tidak ketinggalan dalam arus pendidikan,” katanya.



Antara aktiviti yang dilakukan sepanjang program ini berlangsung ialah perkongsian berkenaan OKU serta cabaran mereka, persembahan daripada mahasiswa OKU dan simulasi OKU penglihatan.

Sementara itu, penasihat program Dr. Mastura Mahamed berkata FBMK telah mengambil langkah proaktif dengan mempertingkatkan kemudahan mesra OKU seperti laluan khas ke bilik kuliah, tandas mesra OKU.

Selain itu, kemudahan seperti tempat letak kereta khas OKU dan laluan khusus seperti tactile di blok-blok akademik juga telah dipasang serta sedang dalam proses membina sistem sentuhan bagi memudahkan pembelajaran buat OKU penglihatan.



“Usaha ini adalah sebahagian daripada komitmen kami untuk memastikan semua pelajar mendapat hak, peluang, dan akses yang sama tanpa mengira kekurangan fizikal.

“Kami mahu memastikan semua pelajar, termasuk golongan OKU, berpeluang cemerlang dalam akademik

“Diharapkan usaha berterusan ini akan memberikan impak positif bukan sahaja kepada pelajar OKU tetapi juga kepada seluruh komuniti universiti, menuju ke arah masyarakat yang lebih prihatin dan inklusif,” katanya. -UPM